

L'umagne rodze de Laitron

U mouemin de la grôs'a maladeye kiè l'a ravadja onna grand'a partcha de l'Europoueu, le petchou velâdze de Prodjeu kontâve onna vintêne de foua don brâmin l'aviv'on dja itô éprovô pè la pèste.

Din on menâdze iô l'omoueu é la fène l'aviv'on dja on n'âdze avinsia, tchui li dzo i sintiv'on mô a on indraï. On biô matîn l'omoueu di a la fène « vouaï ieu si pâ talamin bîn » é la fène laï repon kè ié asebîn keminse a resinti onna lagne.

Tchui li dou pinsav'on a la maladeye kiè tardèrè pâ de li z'inpouortâ. Li vezîn l'aviv'on kouegnu li mimoueu sintôme é le lindèman, on n'avive konstatô leu mà. I fô pâ sè krère, dèman no sarin mà min li z'âtre. Mi ieu vaze kin mimoueu regrètâ le tené kiè n'é inplô d'umagne rodze d'eüton pasô. Dèvan de moueri no varin bâ a la kâve baïre le mi de vîn pouosible.

I son pouaï tchui li dou inmouodô bâ é sè son mètu a baïre tan kè fire. Apri avaï asadô é asadô tînke l'a pekô u vibron, l'on desidô de lasié la giète uvêse. Pouaï na repon la fène kê i peü inkouo sarvi a kêrkon mi no bèy'in on tepîn pèr on dèvan de farmâ la giète. Tan dzêrbe i sè son mètu bâ dézo le ban di bouose é sè son indremaï.

Dou dzo apri, désou é vouari, to kontin d'itre désonô é in via, l'on konpraï kè l'umagne rodze l'a itô mi iô kè la maladeye.

Le 30.06.2012

Kamilô

Sé di Kâve